

NANCY ETCOFF

Survival of the Prettiest. The Science of Beauty.

London: Little, Brown & Co., 1999.

La Etcoff e insegne psichiatrie inte Facoltât di Midisine de Universitât di Harvard a Boston (USA) e e je une des plui ativis studiosis di neuropsicologjie des emozions. In chest libri intitulât “La Sorevivence dal plui ninin. Par une sience de bielege” la Etcoff e presente une schirie di studis e riflessions su la cuestion des basis biologjichis de bielege. La studiosa e partis dal fat che la bielege di une persone e dâ un plasê imediât a la int. Cussì par esempli a bastin 150 miliseconts par ricognossi la bielege de muse di une fantate, par cheste rason il judizi di bielege al è un procès automatic pluitost che une contemplazion razionâl. A la int che e à il cjâf a puest i plâs une vore la bielege fisiche di chês altris personis, e cui che al è biel al à a disposizion un grant podê su di chei altris. Intal passât une vore di studiôs a àn sostignût che la bielege e jere soregut leade a schemis culturâi. I studis de Etcoff a àn invezit mostrât che dutis lis personis a àn intal lôr çurviel un scheme innât de bielege. Pe autore la bielege e je un istint di base de specie umane parcè che cui che al è biel al à plui facilitât a riprodusisi.

Par chestis rasons i frutins di trê mêis a preferissin bielzà sta a cjâlâ lis musis des personis bielis di cualsisei raze, pluitost che cjâlâ lis musis des personis brutis. In plui lis maris dai frutins bieis a stan plui vultintîr dongje di lôr, ju cjalin une vore e ur fevelin plui dispès. Lis maris dai fruts bruts invezit a disin di jessi une vore plui stressadis, a son plui demoralizadis e a si lamentin simpri di no vê avonde bêçs. La Etcoff e presente studis che a mostrin cemût che lis personis bielis a vegnin par solit acetadis cun plui facilitât. Une persone biele e tire a dâ plui confidence e e je plui otimiste di une persone brute. In plui al è stât viodût che i students plui bieis a cjapin in medie votazions plui altis dai students bruts, e la opinion gjenerâl de int e je che lis personis bielis a sedin ancje plui inteligjents di chês brutis.

Daspò la Etcoff e passe in rassegne lis diferencis intal judizi di bielege fra i mascjos e lis feminis. Ai mascjos ur plâs la bielege fisiche, soregut chês des feminis zovinis. Al samee che chest al sedi in relazion cul fat che

lis feminis zovinis e bielis a son plui sanis e fertilis. Par cheste rason lis feminis a spindin une vore di bêçs par sameâ plui zovinis e plui bielis. Intal 1996 intai Stâts Unîts su 600.000 operaziions di chirurgjie estetiche il 90% a jerin feminis. Cheste cuestion de bielege e je une vore impuartante ancje dal pont di viste economic se si pense che lis spesis par i cosmetics e i prodots di bielege e je il 30% dal prodot lort dai Stâts Unîts e il 35% dal prodot lort de Union Europeane. Secont la autore, ai mascjos ur plâs la bielege visive dal aspjet fisic, in plui se a viodin une femine une vore biege i mascjos no son plui interessâts a chês feminis di bielege miezane (efiet di contrast). Par cheste rason lis feminis bielis no stan mai insiemit cun altris feminis bielis. Viodi bielis feminis al è par i mascjos un dai plasês plui grancj e par chest a son soregut i mascjos che a spindin une vore di bêçs inte industrie pornografiche (8 miliarts di dolars ad an). In plui, secont la Etkoff, i mascjos par solit a son interessâts a vê rapuarts sessuâi pussibilmentri cun miârs di feminis bielis e zovins. Par cheste rason dutis lis feminis a cirin 'disperamentri' di sameâ bielis e zovinis.

Di chê altre bande lis feminis di cuasi dutis lis culturis umanis a cirin di concuistâ i mascjos che a àn il plui alt status economic e sociâl. Secont la autore par chest motîf in dutis lis culturis umanis i mascjos a cirin di meti sù gjerarchiis. Inte nestre societât une des robis plui dopradis par tirâ sù lis gjerarchiis a son i bêçs. I bêçs a diventin cussì un dai struments plui potents par vê a disposizion 'risorsis' sessuâls. Ancje un om brut, come il boxêr american Mike Tyson, se al à 42 milions di dolars in bancje (sù par jù 80 miliarts di francs), al pues interessâ une vore di feminis al stes nivel di Clark Gable. Cussì lis feminis a cjatin plui tratîfs i mascjos cul status plui alt ancje se no son bieci. Chest fat nol è mai vêt pai oms. Une femine brute cuntun alt status economic e sociâl no je mai trative par un mascjo. Oltri al status sociâl a lis feminis ur plasin une vore i mascjos che a son grancj, che a fevelin lentementri cuntun timbri de vôs bas. In plui al samee che lis feminis a rivedin, par vie dal odôr, a vê informaziions sul sisteme imunitâri dai oms, in mût di sielzi i mascjos che a àn un sisteme imunitâri diferent dal lôr.

Chest libri de Etkoff al è une vore impuartant parcè che al cîr di studiâ in maniere sientifiche, ven a stâi cui metodis de biologie, de neuropsicologie e de etologie, un argoment cetant impuartant come chel de

bielece. Cuntune vore di studis sperimentâi si pues concludi che la cuation de bielece fisiche no je leade dome a fatôrs culturâi ma che a esistin des basis biologjichis (gjenetichis) che nus puartin a giudicâ biele une muse di zovin/e pluitost che un altre. No bisugne però dismenteâ il fat che la bielece, come i bêçs, no fâs in maniere automatiche la felicitât. La Etcoff stesse nus vise che la felicitât e à plui ce fâ cun altris cualitâts des personis, come l'otimisim, il sens dal ecuilibri, la capacitât di resisti a lis frustrazions e la capacitât di volê ben a un altre persone.

Franc Fari
DSFSS, Universitât di Udin, Italie.
fabbro@sv.Lnf.it